

● СҮЙІНШІ!

## Талантты ақын топ жарды

Қасымхан ҒАЛЫМ,  
«Ortalyq Qazaqstan»

«Орталықтан» қанат қаққан қаламгер, ақын Жәнібек Әлиман «AMANAT» партиясы ұйымдастырған «Ұлы дала» республикалық шығармашылық байқауында топ жарды. Астанадан жеткен ақжолтай хабар мерейімізді үстем қылды.



Өріптегіміз Жәнібек Бақытұлы Ұлт ұстазы Ахмет Байтұрсынұлының 150 жылдығына және жазушы Мұхтар Әуезовтің 125 жылдығына арналған әдеби байқаудың «Поэзия» аталымында үздік шықты.

Иә, бұл есім көзікарақты оқырманға етене таныс. Жәнібек «Орталықтан» жүрген сәтінде мәдениет, әдебиет, руханият төңірегінде өндіре жазды. Руханият бөлімінің ауыр жүгін еркін еңсеріп, өрге сүйреді. Газет бетіндегі ойлы мақалаларына зиялы қауымның үн қатып, пайымды пікір айтқанын көзіміз көрді.

Қазір Жәнібек Әлиман ел газеті «Егеменде» жемісті қызмет етуде. Аталған газетте де руханият тақырыбында қалам тербеп жүр. «Егемен Қазақстан» газеті арқылы есімін ел біліп, жазбаларымен оқырман қауымға рухани азық сыйлап жүргені анық. Қысқасы, талантты жаңа тынысын ашты.

Ал, Қарағандының әдеби ортасынан өсіп-өнген Жәнібек Әлиманның жырларында өр рух басым. Дауылап Қасымның сарқытын аталған жүлдесімен құттықтап, қарашырақтың түлегіне шығармашылықтың шыңында болуына тілектестік білдіреміз.

Бұл мерей Қарағандының әдеби ортасының ғана емес, Арқа журналистикасының да абыройын асқақтатты. Себебі, «Орталық» пен ормандай оқырманның ақ батасын алған Жәнібек Әлиман ғой бұл. Әлі самғайды, жыр жүйрігі.

● ҮКІМЕТ ОТЫРЫСЫНДА

## Тозған желіні жаңарту қажет

Нұрқанат ҚАНАПИЯ,  
«Ortalyq Qazaqstan»

Келесі жылы ел көлемінде жылу желілерін жөндеу бойынша ауқымды бағдарлама қолға алынады. Алдымен тозу деңгейі 70 пайыздан асқан желілер жаңартылады. Бұл туралы Премьер-Министр Әлихан Смайылов Үкімет отырысында айтты.

Премьер-Министр баспасөз қызметінің хабарлауынша, отырыста энергетикалық объектілер мен жылу желілерінің жай-күйін ревизиялау барысы қаралды. Энергетика министрі Болат Ақшолбақов министрлік 37 жылу электр орталығының техникалық жай-күйіне талдау жасағанын жеткізді. Қорытындысында «қызыл аймаққа» – 19, «сары аймаққа» – 11, «жасыл аймаққа» 7 жылу электр орталығы енді. Мұнда жабдықтың тозуы, технологиялық ақаулар саны, пайдалану мерзімі және кадр тапшылығы ескерілді.

Индустрия және инфрақұрылымдық даму министрі Қайырбек Өскенбаев қалалардағы 12,1 мың шақырым жылу желісінің 6,7 мың шақырымын ауыстыру қажет екенін мәлімдеді. Орташа тозу деңгейі – 55 пайыз.

Әлихан Смайылов өңірлердегі проблемалар осы уақытқа дейін жасырылып келгенін айтты. Тексерулер нәтижесі нақты жағдай мен бұған дейін берілген ақпарат арасы тым алшақ екенін көрсетті. Станциялар мен желі иелері жеткілікті инвестиция салмаған. Қараусыз жатқан желілердің мәселелері де шешімін таппады.

– Бізде қыс айлары өте қатал. Яғни, апаттар бұған дейін де болып тұрды. Бірақ, олар саны жағынан да, ауқымы жағынан да мұндай болған емес. Баспасөз бен әлеуметтік желідегі шағымдарға қараңыздар. Барлық өңірде мындаған шағым бар. Бұл бір



күннің ғана проблемасы емес. Жылдар бойы қордаланып келді, – делі Үкімет басшысы.

Энергия тапшылығы өткір тұр. Премьер-Министрдің айтуынша, қалалар кеңейіп, құрылыс секторы қарқынды дамуда. Абоненттердің саны артты. Мұның барлығы қолданыстағы жылу резервтерінің сарқылуына алып келді. Мұндай жағдай Астана, Алматы, Павлодар мен Ақтауда тіркелді. Аудандардың шалағай жоспары, тұрғын үйлер мен жылу желілерінің бейберекет салынуы апатты жағдайларға әкелді. Қалаларда ауаны ластайтын автономды қазандықтар көбейіп кетті.

Екі айдың ішінде екі ірі апат тіркелгенін, Өскемен, Рудный, Семей, Ақтау, Павлодар мен Теміртау қалаларының жылу жүйесінде қауіпті жағдайлар орын алғанын айтқан Премьер-Министр тиісті жұмыстар жүзеге асырылатынын жеткізді.

– Келесі жылдан бастап жылу желілерін жөндеу бойынша ауқымды бағдарлама басталады. Бірінші кезекте тозу деңгейі 70 пайыздан асып кеткен жылу желілері ауыстырылады. Мұндай желілер – 1600 километр. Екінші кезекте 4 мың километрге жуық желі жаңартылады. Бұл өте ауқымды жұмыс әрі көп қаражатты қажет етеді, – делі Әлихан Смайылов.

Отырыста облыс әкімі Ермағанбет Бөлекпаев аймақтағы жылу беру нысандарын дамыту перспективалары туралы баяндады.

Көмірлі өлкенің энергетика саласында 7 станция, 3 өңірлік электр жеткізу компаниясы, 35 энергия өндіру және 40 жылу беру ұйымы бар. Жылу электр орталықтарындағы қазандықтардың тозуы – 75 пайызды, турбиналар тозуы 70 пайызды көрсетіп отыр. Ал, электр желілері – 69 пайызға, жылу желілері 67,7 пайызға тозып

тұр. Бүгінде бұл көрсеткіштерді жақсарту мақсатында жоспар құрылды.

– Станциялардың қуатын арттыру үшін бірқатар жоба жүзеге асырылады. 2027 жылға дейін 4 станцияда 3 жаңа қазандық пен 5 турбина іске қосылады. Бұл станциялардың электр қуатын 310 МВт-қа және жылу энергиясын 430 Гкал/сағатқа арттыруға мүмкіндік береді. Электр желілері мен қосалқы станцияларды жаңғыртуға 2025 жылға дейін 62 млрд. тенге инвестиция тартылады. Бұл олардың тозуын 67,3 пайызға дейін төмендетеді, – делі аймақ басшысы.

Биыл 49 шақырым жылу желісі жөнделіп, жаңадан салынды. Ал, келесі жылы аталған жұмыстар 57 шақырымды қамтиды.

Облыс әкімінің айтуынша, қазіргі уақытта басты жобаларды қаржыландыруды ұлғайту мәселесі салалық министрліктермен бірге пысықталуда.

● МӘСЕЛЕ

## Қымбат дәрі дертке дәру бола ма?

Сағыныш ӘБІЛ,  
«Ortalyq Qazaqstan»

Қарапайым халық үшін аса қажет тауардың бірі – дәрі-дәрмек. Дәрі-дәрмек төңірегінде шешімін таппай жатқан мәселе көп. Ең өзектісі – дәріхана сөресіндегі препараттардың бағасы қымбат. Тұрғындарды әбден әуреге салған дәрі-дәрмек бағасына қатысты түйткілдің түйіні тарқамай тұрғанына да талай жылдың жүзі болды. Қазақстан дәрі-дәрмегі қымбат елдердің қатарына кіреді. Дүниежүзілік денсаулық сақтау ұйымының мәліметінше, дәрі бағасы Қырғыз, Ресей, Беларусь елдерінен жоғары. Халықаралық ұйымның қорытындысынан бөлек, елімізде кейінгі екі-үш айда дәрі бағасы 30 пайызға қымбаттаған.

2-бетте



● ШЫҒАРМАШЫЛЫҚ КЕШ



## Дала тағылымын алған дарын

Жан АМАНТАЙ,  
«Ortalyq Qazaqstan»

Ерлан Төлеутай есімі кешегі Мәди кейінде көпшіліктің көңіл төрінде. «Қарақесек» әні оның өнердегі рухын өрлеткен ұраны іспеттес еді. Арқадағы алғашқы кешінің шымылдығын Ерлан Төлеутай Ақселеу Сейдімбектің «Сарыарқасымен» түрді. Әуелден әуелете ән салғанда әр жерден мағмұрланар жұрт құлағы бұл жолы да сак еді. Сахнада ән салған әнші көмбеден көсілген жүйрік секілді емес пе?! Залдан естілген кику Ерлан Мұқатайұлын одан әрі арқаландыра түскендей.

Қарағанды облысы әкімдігінің қолдауымен хәм мәдениет, архивтер және құжаттама басқармасының ұйымдастыруымен Кеншілер мәдениет сарайында дәстүрлі әнші, композитор, кинодраматург, өнертанушы Ерлан Төлеутайдың «Атыңнан айналайын, Қарағанды!» атты ән кеші осылай басталып кетті.

8-бетте

## Құрметті оқырман!

ОБЛЫСТЫҚ  
«ORTALYQ QAZAQSTAN»  
ГАЗЕТІНЕ 2023 ЖЫЛҒА  
ЖАЗЫЛУ НАУҚАНЫ  
ЖҮРІП ЖАТЫР

Газетке жазылуды «Қазпошта» АҚ пошта байланысының барлық бөлімшелерінде, Ермеков көшесі, 33-үй, 8-қабат мекенжайы бойынша редакцияда ресімдеуге болады

| Санаттар                      | Жеткізусіз   | «Қазпошта» АҚ Қала (теңге)     | «Қазпошта» АҚ Аудан/ауыл (теңге) |
|-------------------------------|--------------|--------------------------------|----------------------------------|
| Кәсіпорындар мен ұйымдар үшін |              | 6 ай 5848,50<br>12 ай 11697,00 | 5919,00<br>11838,00              |
| Жеке жазылушылар үшін         | 12 айға 4116 | 6 ай 3100,50<br>12 ай 6201,00  | 3111,00<br>6222,00               |

| Санаты                        | Жеткізусіз | «Қазпошта» АҚ каталогымен қала бойынша | «Қазпошта» АҚ каталогымен аудан/ауыл |
|-------------------------------|------------|--|--------------------------------------|
| Кәсіпорындар мен ұйымдар үшін |            | 10257,00                               | 10470,00                             |
| Жеке жазылушылар үшін         | 3492       | 5577,00                                | 5706,00                              |

Анықтама телефоны:  
8 771 528 86 46, 8 702 656 70 61  
E-mail: otdel.pochtovyy@bk.ru











# Бала өнері – көрмеде

Гүлнұр СЕРІКЖАНҚЫЗЫ,  
«Ortalyq Qazaqstan»

Қарағанды облыстық бейнелеу өнері музейінде балалар жылы аясында ұйымдастырылған «Мур-мур» көрме-байқауының жеңімпаздарын марапаттау рәсімі өтті. Мектеп оқушылары мен өмірлік қиын жағдайға тап болған балалар арасында «Мур-мур» көрме-байқауын өткізу жыл сайын дәстүрге айналған. Бұл жолы «Таңшолпан» балалар үйінің тәрбиеленушілері қатысты.



– Биылғы «Мур-мур» көрме-байқауына 6-12 жас аралығындағы балалар қатысты. Қатысушылар байқауда мысықтың бейнесін салады. Дәстүрге айналған шығармашылық сайыс пандемия кезінде өткізілмей қалды. Дегенмен, бұл жалғастық үзілмей келе жатыр. Балалар өз жұмысын дайындап, бізге жібереді. Біз жеңімпаздарды анықтап, қатысқандарға Алғыс хат пен түрлі сыйлықтар табыстаймыз. Жұлделер мен сыйлықтар сатып алуға көмектескен «Плаза» сауда үйі мен Қарағанды қаласы коллекционерлер

клубының демеушілеріне алғыс айтамын, – деді Қарағанды облыстық бейнелеу өнері музейінің басшысы Бибігүл Құдабаева.

Бибігүл Сағынтайқызының айтуынша, мұндай байқаулар балалардың шығармашылық белсенділігін арттырады, шабыттандырады. Музей көрмесіне келудің өзі балаларға ұнайды. «Біз балалар үшін музейде экскурсия ұйымдастырамыз. Жас жеткіншектерді мәдениет нысандарына әкелу өте маңызды. Балалардың жолын ашақ, олар басқа уақытта да келіп тұрады, – дейді ол.

Көрмеге балалардың түрлі қарындаштармен салған мысықтың суреттері қойылды. Арасында қолмен жасағаны да, моншақпен көркемделгені де бар. Көрмеге ілінген өз жұмыстарын көрген балалар мәз болысты.

Сондай-ақ, шеберлік сағаты ұйымдастырылды. Жеткіншектер қағаздан өрнектеп, қар ұшқынын қиды.

«Таңшолпан» балалар үйінің тәрбиеленушілері арасында ұйымдастырылған «Мур-мур» көрме-байқауында бас жүлде Алина Ноғайбаеваға берілді. Жанар Аканова II орын алса, Аделя Могутина III орынға қол жеткізді. Көрмеге белсене қатысқан балалардың барлығына Алғыс хат пен арнайы сыйлықтар табысталды.



Суреттерді түсірген автор.



# Жанға жайлы мәнді кеш

Сағыныш ӘБІЛ,  
«Ortalyq Qazaqstan»



Тәуелсіздік мерекесі аясында Н.Гоголь атындағы облыстық кітапханада «Рухани келісім – бейбітшілік кепілі» атты кездесу кеші өтті. Этномәдени орталықтардың ұйытқы болуымен өткен шараға облыстық Мәдениет архивтер және құжаттама басқармасы басшысының орынбасары Ерлан Нілдібаев қатысты.



– Ата-бабаларымыз армандаған тәуелсіздікті көздің қарашығындай сақтау парыз. Ұлттық құндылықтарымызды ескере отырып, өткенге құрметпен, келер күнге үміт арта отырып, қарышты қадам жасау міндеті тұр. Жаңа Қазақстанның да басты мақсаты осы, – деп жүрекжарды лебізін жеткізді Ерлан Нилдібаев.

Рухани кешке тілгегі бір, тілеуі ортақ Тарас Шевченко атындағы «Ріднеслово» украин тілі бірлестігі, «Дакия» Румын мәдени орталығы, корей этномәдени бірлестігінің «КИППЫМ» ән-би ансамблі, Тәжік этномәдени орталығы бірлестігінің өкілдері және «Қарақат» мектеп-студиясының «Көңілшар» ансамблі қатысты.

Тарас Шевченко атындағы

«Ріднеслово» украин тілі бірлестігінің жетекшісі И.Салагина еліміздің бүгінгі қол жеткізген маңызды ескері отырып, өткенге құрметпен, келер күнге үміт арта отырып, қарышты қадам жасау міндеті тұр. Жаңа Қазақстанның да басты мақсаты осы, – деп жүрекжарды лебізін жеткізді Ерлан Нилдібаев.

Жанымызға – жылду, бойымызға қуат берген кітапханада өткен шара көрермендер көңілін шаттандырды. Түрлі ұлт өкілдерінің бір шаңырақ астында тату-тәтті тұруы да осы Тәуелсіздіктің жемісі.

## ● ТӘУЕЛСІЗДІК ҚАЛҚАНЫ

# Саптағы соңғы сәт

Жан АМАНТАЙ,  
«Ortalyq Qazaqstan»

ҚР Ұлттық ұланы 5451 әскери бөлімінде 2021 жылы сап түзеген сарбаздар қызметтік борышын өтеп, үйлеріне қайтқалы жатыр. Қуанышы қойнына сыймаған жас сарбаздарды әскери бөлім мерекелік кеш ұйымдастырып шығарып салды.



Іс-шараға сарбаздарға игі тілегін білдіріп, Құрмет грамотасын табыстау үшін Қарағанды қаласы Әлихан Бөкейхан ауданының әкімдігі, Қарағанды қаласы полиция басқармасының бөлім басшылығы мен ардагерлері қатысты.

Шара барысында ҰҰ «Орталық» өңірлік қолбасшылығының қолбас-

шысы генерал-майор Сәкентай Шекербек пен Қарағанды полиция департаменттерінің бастықтары мен бөлім командирі атынан 200-ден астам әскери қызметшіге Құрмет грамоталары мен Алғыс хаттар ата-аналарының атына «Отанына хат» және 20 әскери қызметшіге санатқа көтеру, яғни, «сәфрейтор»

әскери шені табысталды.

Еске сала кетсек, аталмыш сарбаздар 2021 жылдың қараша айында Жамбыл, Түркістан, Алматы, СҚО, ШҚО, БҚО, Ақмола облыстарынан келген еді. Енді бүгін Отан алдындағы борышын абыройлы атқарып туған топыраққа асыға атанды.

## ● МҮШӘЙРА

# «Жас жүрек жайып саусағын»

Жан АМАНТАЙ,  
«Ortalyq Qazaqstan»

«Шырақ» тілдерді оқыту орталығының ұйымдастыруымен Жаңа Майқұдық мәдениет үйінде еліміздің Тәуелсіздік күніне орай, өлең өлкесіне қанат қаққан жас буынның шығармашылығына қолдау көрсету, жазба ақындық өнерді дамыту, мемлекеттік тіліміздің мәртебесін көтеру мақсатында студент жастар арасында ұйымдастырылған «Еркіндігім – ең қымбаттым, киелімі!» атты жыр мүшәйрасы мәреге жетті.

ның өлеңі іріктеліп, нәтижесінде I орынды Нұрәулет Марат иеленсе, II орын Дамила Досмахова, III орын Тілеужан Қамысбай, Бектас Жұман, Ділімәз Дәрігулға берілді. Ал, Мирас Құрақбай, Серхан Сайрангул, Қырмызы Аллаберенова мүшәйраның арнайы жүлде иегерлері атанды.

Сонымен қатар, жыр кеші барысында С.Бөдесов, Е.Марат, М.Кәрімінің туған ел тақырыбында шырқаған әндері кеш көрігін қыздыра түсті.

Аталмыш жыр додасына ақын, Қазақстан Жазушылар одағының мүшелері, ақын Лияз Мұқай, Жәлел Қуандықұлы, Эльмира Сайлауқызы қазылық жасады.

– Осындай мүшәйралар өлеңге талаптанıp жүрген жастардың қиялына қанат бітіреді. Әдебиетке қызығушылығы артып, қаламын ширай түседі. Жиналған барша үміткердің еңбегін ескеріп, жүлдеге лайықтыларын марапатқа ұсындық, – дейді шараны ұйымдастырушы, «Шырақ» тілдерді оқыту орталығының директоры, ақын Саят Тұяқбай.

Қазылар алқасының сараптауына ұсынылған 20-ға тарта жас буын өлеңдерінің арасынан сегіз ақын-



## ● КЕЗДЕСУ

# Алаш айлығы аясында

Қалалық деңгейде қолға алынған «Алаш айлығы» аясында Қарағанды облысының тілдерді дамыту жөніндегі басқармасы жанындағы Ресурстық тіл орталығында қаламыздағы тарих пәні мұғалімдерінің қатысуымен «Алаш арыстары және ұлт ұстазы» тақырыбында кездесу өтті.



Кездесуге Е.Бөкетов атындағы Қарағанды университетінің профессоры, филология ғылымдарының докторы Жандос Смағұлов және тарихшы-ғалым Ергазы Төлеу арнайы қонақ ретінде шақырылды.

Іс-шара барысында кеш қонақтары тақырып аясында ой ербіте отырып, бұрын-соңды айтылмаған құнды ақпараттарды айтты. Атап айтқанда, еліміздің шекарасын шегендеудегі Алаш қайраткерлерінің роліне тоқталды. Ұлт жанашырлары қатарында Ахмет Байтұрсынұлының елеулі еңбегі бар екенін тілге тиек етті.

Одан әрі қатысушылар белгілі тұлғалардың ұлт ру-

## Әдеп жөніндегі уәкілдің қызметі

Қазақстан Республикасы Президентінің 2015 жылғы 29 желтоқсандағы № 153 «Қазақстан Республикасы мемлекеттік қызметшілерінің этикалық нормалары мен мінез-құлық қағидаларын одан әрі жетілдіру жөніндегі шаралар туралы» Жарлығы орындау үшін Әдеп жөніндегі уәкіл қызметтік этика нормаларын сақтауды және заңнаманы бұзушылықтардың алдын алуды қамтамасыз ету бойынша өз қызметін жүзеге асырады, сондай-ақ өз функциялары шегінде мемлекеттік қызметшілер мен азаматтарға кеңес береді.

Әдеп жөніндегі уәкіл туралы Ереженің 4-тармағының б) тармақшасына сәйкес, Әдеп жөніндегі уәкіл өз құзыреті шегінде мемлекеттік қызметшілердің қызмет этикасы нормаларының сақталуына мониторинг пен бақылауды жүзеге асырады.

Осыған байланысты этикалық нормалардың бұзылуының алдын алу, мемлекеттік қызметшілердің әдептілік деңгейін арттыру мақсатында әдеп жөніндегі уәкіл тұрақты негізде семинарлар мен дәрістер түрінде түсіндіру іс-шараларын өткізеді.

Осылайша, 2022 жылы Әдеп жөніндегі уәкіл Қазақстан Республикасы мемлекеттік қызметшілерінің Әдеп кодексін сақтауға, «ҚР мемлекеттік қызметі туралы» және «Сыйбалас жемқорлыққа қарсы іс-қимыл туралы» Заңдарына енген өзгерістер мен толықтыруларды талқылауға қатысты 4 семинар өткізді. «Орталыққазжерқойнауы» ӘД РММ мемлекеттік қызметшілері арасында қызметтік әдеп нормаларының сақталуын және ұжымдағы моральдық-психологиялық ахуалдың жай-күйін мониторингтеу мақсатында анонимді 2 сауалнама жүргізілді. Сауалнама нәтижелері департаменттегі моральдық-психологиялық ахуал тұрақты және жайлы екенін көрсетті, ұжымда іскерлік және тілектестік қарым-қатынастар, сындарлы ынтымақтастық нығаяды.

Сондай-ақ, Әдеп жөніндегі уәкілдердің қызметін одан әрі жетілдіру бойынша 2022 жылға арналған жоспарды орындау мақсатында іс-шаралар өткізілді.

Сыйбалас жемқорлық құқық бұзушылықтар туралы ақпаратқа жеделдену үшін жеке және заңды тұлғалардың хаттары мен өтініштеріне арналған пошта жөнігі тұрақты негізде жұмыс істейді. Департаменттің стендіде және «Орталыққазжерқойнауы» ӘД РММ интернет-ресурсында әдеп жөніндегі уәкілдің байланыс телефондары орналастырылған.

Әдеп жөніндегі уәкілге телефон арқылы хабарласуға болады: 8-708-548-66-20, 8(7212)41-33-67 және электронды поштасы a.zhunusov@ecogeo.gov.kz.

«Орталыққазжерқойнауы» ӘД РММ



Электрондық пошта:  
ortalyk.kaz@mail.ru

